

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"E ore te feia e parau mai ia'u ra e, E te Fatu, e te Fatu, e hope paatoa i te tae i te basileia ra o te ao, o te taata râ i haapao i te hinaaro o tau Metua i te aora." Mat. 7: 21.

Nu. 4.

10 Tenuare, 1911.

Mat. 4.

Iesu e Iosepha Semita.

UA AU te haapaoraa a Iesu Mesia i te Feia Mo'a i te Mau Mahana Hopea Nei o tei parauhia "Moromona" i te hoê oire rahi i patuhia ei haapuraa paari o tei ore roa e tia ia tomohia e te mau enemi i rapae au e e faaeearaa mau hoi ia i to roto. No te mea ua haaatihia taua oire nei i te haapiiraa o tei faatumuhia i nia iho i te papa heheuraa. No reira ua tia roa te mana'o e e tiaraa aueue ore teie nei Ekalesia a te Atua e e vai â teie e amuri noa'tu. Te mea i papaihia teie nei parau iti o te faaite atu i te huru maere rahi no te tau o Iesu Mesia e o Iosepha Semita i to raua oraraa e ta raua ohipa hoi i te fenua nei. E ia riro teie nei parau ei haapapuraa i te faroo i roto i te aau o te taata nei.

Hiroa Hoê: I mua roa'tu i te taeraa mai o te Mesia e i mua roa hoi i te fanauraa a Iosepha Semita. Aore roa te re'o heheuraa apî i faaroohia i te ao nei. E 400 matahiti i mua'tu i te Mesia ua faaoti Malaki i ta'na ra buka o te parau heheuraa faaoti i mua'tu i te Mesia. Tei faaoti i te parau heheu i mua i te tau no Iosepha ra o te Apokalupo ia a Ioane ra.

Hiroa Piti: Te ora ra te Mesia ua amahamaha noa te Ekalesia ati Iuda ei na pupu ra oia te Pharisea, Sadukea e e rave rahi atu â. I te tau no Iosepha ua amahamahahia te faaroo Cherisetiano ei na haapaoraa mârô noa e rave rahi te hanere.

Hiroa Toru: Ua fanau maira te Mesia i roto i te fare parahiraa puaa. O Iosepha râ ua fanau mai i te hoê fare iti tumu raau. Te metua tiaï no Iesu ra e tamuta ia e to Iosepha metua ra e faaapu ia, e e huru veve e te haehaa to raua na metua atoa ra. Tupu atura raua i te paariraa mai te ite ore i te haapiiraa paari o teie nei ao.

Hiroa Maha: I te ahuru ma piti no to Iesu matahiti i haamata ai oia i te rave i te ohipa a to'na ra Metua, e ua maere noa te mau orometua ati Iuda i to'na paari. Ua apî roa hoi Iosepha, oia hoi i te 14 no ta'na ra matahiti i heheu mai ai te Mesia ia'na i te ohipa hanahana e vai i mua ia'na ra. E mai reira mai â ua faaite mai oia i te iteraa hohonu no te pae varua, tupu atura te riri o te mau orometua i te reira.

Hiroa Pae: Poro noa maira te Mesia e e Tamaiti oia na te Atua Ora ra. Ua parau mai Iosepha e e peropheta oia na te Atua Ora ra. Ua parau maira Iesu e e feia haavare te mau tahu'a rarahi e ua opani ratou i te basileia o te Atua, e ei mau aratai matapo hoi o tei ore i haapao i te mau ture tumu o te ture, e e feia faaahaaha i te parau ra e aore ratou i faatia i to ratou ra mau metua i te taparahiraa i te mau peropheta a pehi noa'i, e a taparahi noa'i hoi i teitonia hia mai e te Atua i rotopu ia ratou. (O te hara teie no te mau ui'atoa.) Ua patoi te Mesia i to ratou mau haapaoraa atoa ra; faatia a'era i ta'na ihora. Ta Iosepha i pii atu teie ia; aore te haapaoraa a te Atua i te fenua nei e e parau faufaa ore ta ratou mau haapiiraa i mua i te Atua ra e feia hapa te mau orometua i haapii noa ratou i te parau a te taata ra. Faatia atura oia i te Ekalesia a te Atua.

Hiroa Ono: No te mana i tuuhia mai ia Iesu, ua tuu oia i te mau toroa i roto i ta'na Ekalesia, oia hoi; te apose-

tolo, te peropheta, te haapii evanelia, te orometua e e rahi atu â, tonohia'tura ratou e te mau hitu ahuru, e te peresibutero atoa i te pii haereraa i te evanelia ra, oia te parau no te faaroo, te tatarahapa, te bapetizo ei haamatararaa hara, e te horoa i te Varu Maitai na roto i te tuuraa rima. Riro mau atura tei faaroo i te mau tapao i faaitehia i te Mareko 16: 16-18. Ua na reira atoa te peropheta ra o Iosepha.

Hiroa Hitu: Ua parihia raua toopiti i te hara faainaina atua i te mea i parau mai Iesu e Tamaiti oia na te Atua, e o Iosepha i parau mai e peropheta oia na te Atua. O raua atoa tei hamani-ino-hia, e tei ririhia e te mau orometua e te mau tahu'a. Ua parihia raua i te hara orure hau. Te hoê no te mea ua haapii mai oia e arii no te ati Iuda i tepae varua; i te tahi no te mea ua parau mai oia ua riro te Ekalesia ta te Atua i faatupu na roto ia'na ei Basileia a te Atua.

Hiroa Vau: O te feia haapii-ore-hia e te tao'a rii tei farii roa i ta raua haapiiraa. Ua tapao mai te feia mana e te mau orometua rahi, e te teoteo ia Iesu e ia Iosepha Semita hoi ei na taata haavare. Ua maiti te Mesia ia Petero te ravaai e te tahi atu â o tei haehaa mai ia'na ra. Hoê â ia ta Iosepha ohipa. Ua maiti oia i te taata peni fare ia Birkama Youne e te tahi atu â pue taata haehaa ra ei mau ite mau na te Atua i te tau hopea nei.

Hiroa Iva: Ua tonono atura Iesu i to'na mau vea ei poro haere i te evanelia mai te hoo ore atu i te taata atoa, aore hoi teie nei mau vea i afai atu i te moni. Ua parau râ ratou e e pee te mau haamaitai o te varua e te mau tapao i tei faaroo. Ua na reira atoa Iosepha Semita. E nunaa iti rahi te mau ite i faaite mai e parau mau roa ta te mau vea; ua pee mau mai te mau tapao i te tau no Iesu e i te tau no Iosepha Semita atoa hoi.

Hiroa Ahuru: Ua parau mai Iesu, e o Iosepha atoa e hamani-ino-hia to ratou mau pîpî e tae noa'tu i te poheraa, e oia mau atura. I roto i te hau Roma, te hau tiamâ roa i te pae varua i taua tau ra ua tupu mau atura ta Iesu parau.

I roto i te hau Amerika o tei na mua roa i te paruru i te mau haapaoraa ua tupu roa ta Iosepha faaiteraa.

Hiroa Ahuru Ma Hoê: Ua faaite atoa mai Iesu i to'na poheraa. Ua na reira atoa Iosepha. I to Iosepha ma faa-rueraa ia Navu i te haereraa'tu i Karetate i te vahi i haavarehia'i oia e i taparahihia'i hoi. Ua faaite maira oia e te haere râ oia mai te fanau'a mamoe i te taparahiraa. Na Iuda Iesu i haavare e na te mau taeae haavare i te faaroo Iosepha i tuu atu i te pohe.—Butera.

Te Parau Tuatapapa no
Iosepha Semita.

(TUATIRAA.)

PENE IV.

MATAHITI 1823.

*Te orama i te poipoi. Ua faaite Iosepha i ta'na metua tane.
Ua tae atu oia i te aivi ra o Kumora. Ua itea te mau
api auro ia'na. Te faaueraa a Moroni.*


U A RAVE noa Iosepha i te ohipa i taua poipoi ra mai te mea ra e, aore te hoê mea i iteahia e a'na. Aore oia i parau noa'tu i te orama, area râ tei reira paha te mana'o rahi i te vairaa i roto i to'na aau. Ua mana'o a'era oia e e tupu faahou mai â te hamani ino ia'na ia faaite atu oia e ua tae mai te hoê melahi ia'na. Aita e au ia'na ia rave i te ohipa mai te itoitaito rahi, no te mea hoi ua huru paruparu. Ua ite ta'na metua tane e e huru paruparu oia, no reira ua parau atu ia'na a haere i te fare. Haere atura Iosepha a tae atu ai i te tahi aua, tamata ihora i te paiuma na nia iho ei reira i matapoirihia oia, mairi ihora i nia i te fenua. E i muri iti a'e i te reira ua faaroo oia i te tahi re'o i te parauraa mai ia'na i te piiraa mai i to'na i'oa. Hi'o a'era Iose-

pha i nia e inaha tei pihaiiho ia'na te hoê melahi, o Moroni te i'oa, e ua vehihia oia i te maramarama e te hanahana rahi. Ei reira ua faaite faahou â oia ia Iosepha i te mau mea ta'na i faaite mai ia'na i te rui i mua a'e, e ua faaue oia ia Iosepha a haere e faaite atu i ta'na metua tane i te orama e te mau parau atoa i haapiihia ea'na. Haapao ihora Iosepha i te reira. Ho'i atura i ta'na metua tane ei reira to'na faaiteraa'tu ia'na i te mau mea e hope roa ta'na i ite na. Tupu a'era to'na maere i te rahiraa, area ra ua farii mai oia i te reira ei parau mau, e ua na ô maira ia Iosepha, no ô mai i te Atua ra taua mau mea nei, e ua parau oia a haere e e haapao hoi i te mau mea i faauehia mai e te melahi. E i muri a'era ia roaa faahou â Iosepha i te puai rii ua haere oia i te aivi ra o Kumora ei imi i te papaa parau mo'a. E ere ia te vahi roa i haerehia'tu e a'na e piti noa iho maile e te afa, area râ i ta'na haereraa ua faahema-hua-hia ia oia ia rave noa taua mau api auro ei faufaa na'na iho.

Teie râ ua tauturuhia mai ia oia e te Varua Mo'a tei vai ia'na ra, no te reira ua tia ia'na ia faarue taua mana'o hape no'na ra. E tae a'era oia i te pae tooa o te râ i fatata a'era i te vahi i nia roa'i i taua aivi ra o Kumora, ua itea te tahi ofai e huru menemene rii i nia'e i te repo, ia heru rii i te repo no nia i taua ofai ra, ite atura oia e e ofai tapoi afata te reira. Ia hi'o-noa-hia taua ofai ra e te taata e mana'o a'era ratou e e ofai noa iho â. Ua ite na ia Iosepha i oramahia'i oia i te vairaa o taua mau mea nei. I muri a'e i ta'na heruraa i te repo no nia i taua ofai tapoi ra ua rave mai oia i te tahi raau pana, e ua tuu oia i taua raau i raro a'e i te hiti o taua ofai ra a pana'i e ua mahiti noa te tapoi no nia iho i taua afata ofai ra. E afata ofai paari i patu-êhia na ia i te ofai e te pua, (cement) e ua vai maitai â aita roa i ino noa'e. E inaha hoi tei roto i taua afata ra te mau api auro, te Urima e te Tumima e te tapoi ouma mai tei faaitehia mai e te melahi. E ite a'era Iosepha i taua mau

mea ra ua faatoro ta'na rima a rave atura. E inaha tei pihaiho te melahi e ua paruru ia'na. Tei te mahana 22 no Setepa i te matahiti 1823 i itea Iosepha i taua mau mea ra. E ua parau mai te melahi aore i tae te tau mau e noaa te reira mau mea ia'na, e e vai â ratou i roto i te afata vairaa mau mai te tiaia-ore-hia'tu e te rima taata nei e tae noa'tu i te tau i haapaohia e te Atua ra. E ua poroi mai te melahi e ho'i mai oia i taua vahi ra hoê matahiti-tia a muri atu i taua mahana ra, oia hoi i te 22 no Setepa i te matahiti 1824. Haapao ihora oia i taua faaueraa ra i tera matahiti e i tera matahiti e hope roa'i na matahiti e maha. Ua faaite mai Moroni ia Iosepha ua huna-ê-hia na ia i ta'na iho rima te papaa parau tei ootihia i nia i te mau api auro ra i na tene-tere e maha hanere e tiahapa i mairi a'enei a ora'i oia i te fenua nei i muri a'e i te fanauraa o Iesu Mesia. Ua faaite mai Moroni ia Iosepha te i'oa i mairihia i taua aivi ra e te ati Nephi o Kumora ia, e te i'oa tei mairihia e te ati Iareda o Rama ia. E e aivi tuiroo te reira i te mau parau tuata-papa o na nunaa toopiti i moe a'enei. Ua opani te orama. Ua tuu Iosepha i te ofai tapoi i to'na vairaa mau. Haere atura oia i te fare. E i taua po iho â hou to'na taotoraa ua pure e ua haamaitai'tu oia i te Atua ra no te mau mea ta'na i'haapii mai ia'na, e ua pure oia i te Atua ma te aau haehaa ia tiaï-maite-hia oia e a'na e ia parahi oia mai te haapao maitai e te viivii ore. I roto i na hora 24 e pae fâraa mai a te melahi ia Iosepha e ua ite na oia i te mau api auro, oia hoi te papaa parau te reira no te feia i moe na o tei parahi i te fenua ra o Amerika i tahito ê ra. E ua ite atoa oia i te Urima e te Tumima e te paruru ouma auro ra. E i faai-tehia mai oia i te mau ohipa e vai nei ia'na, e i te tahi mau mea e faaoromaihia e a'na e tia'i, e te tahi mau ohipa e ravehia e a'na e tia'i.—VILIAMU SETEMILA.

(E tuatihia mai teie parau.)



TEIE TE HOHO'A NO TE PUPU HIMENE NO TE EKALESIA A IESU
 MESIA I TE FEIA MO'A I TE MAU MAHANA HOPEA NEI
 I TE OIRE RA O ROTO MITI, UTAHA, I AMERIKA.

E Mea Tia Anei te Bapetizoraa Tamarîi?

TE OFATIRAA i te ture o te hara ia. Ua ofati Adamu raua o Eva i te ture a te Atua a amu ai raua i to te raau i rahuihia, e i parauhia te reira te hara tumu. “Te faaroo nei matou e, e faautuahia te taata atoa no ta ratou iho ra mau hara, eiaha râ no te hara a Adamu.” No reira te taa maitai te mana‘o e e ore te taata e faautuahia no ta’na hara, no to ratou ihora, e aita’tu. E teie nei no te taata hoê ra i ô mai ai te ino i te ao nei, e no te ino hoi te pohe, e ua taea-atoa-hia te taata atoa e te pohe i te mea ua hara paatoa. E teie nei, mai te taata atoa i taea i te utua faahapa i te hara a te taata hoê ra, ua taea-atoa-hia te taata atoa i te tia ia ora i te parau-tia a te taata hoê ra. Rom. 5: 12-18. Ua hara paatoa te mau taata mai te anatau mai â o Adamu ma e inaha noa nei; maori râ o Iesu ana’e. Mai te papaihia ra e “O tei ore roa i rave i te hara, e aore roa e haavare i itea i to’na vaha.” Eiaha mai tei papaihia e te tahi pae taata e. “Ua ite atoa ia tatou e e te ino ra o taua hara ra, ua tae atoa ia i nia i to’na huaai paatoa ra; maori râ o Maria.” O vai ra o Maria? Te metua vahine ia oia na Iesu i te pae tino nei. E huaai anei oia na Adamu? E e huaai hoi oia na Adamu. Te ora nei anei oia i teie nei? Aita paha. No te aha ra? No te mea. “Aore roa e taata parau-tia e hoê iti a’e, ua rave paatoa hoi i te hara, e ua ere, i te haamaitai a te Atua ra.” E ua hope hoi i te pohe ia Adamu. E no reira ua papu roa ia tatou e aita roa hoê taata parau-tia o tei ore i rave i te hara, maori râ o Iesu ana’e. “Ua opani-atoa-hia râ te taata atoa e te parau papaihia nei i roto i te hara.” Eaha hoi te utua no te hara? Te utua no te hara o te pohe ia. “Mai te taata i hope i te pohe ia Adamu, e hope atoa i te faaorahia i te Mesia. Ua au hoi te parau o te Mesia i te tahi pae taata, tei na ôraa mai e.” “E mea fau-

faa ore râ ta ratou e pure ia'u nei, a haapii ai i tei tuuhia mai e te taata ana'e ra." E ore tatou e faautauhia no te hara a Adamu. No te mea, na ô hoi te parau. "A hi'o na i te Arenio o te Atua o tei hopoi ê atu i te hara o te ao." No te hara a Adamu ma ua ô mai te pohe i roto i teie nei ao; ua faaoraroa râ Iesu ia tatou i te reira a faatupu ai Oia i te tia-faahou-raa o te tino pohe no te taata paatoa. "Mai te taata i hope i te pohe ia Adamu, e hope atoa i te faaorahia i te Mesia." E haavahia te taata atoa e au i ta ratou iho mau ohipa i ravehia e ratou i roto i te tino nei. 2 Kor. 5: 10. Ua haapii haere Iesu i te parau maitai o te basileia o te Atua, na o atura, "A tatarahapa a faaroo mai i te evanelia." Ua parau atu anei Iesu i te mau tamarii rii a "tatarahapa a faaroo i te evanelia." Aita paha no te mea e e orometua paari oia aore oia e ani atu i te tahi mea, tei ore e tia ia haapaohia e te taata ta'na i haapii ra. Hoê â ia te haapiiraa o Petero na ô atura oia "e tatarahapa e ia baptizohia outou atoa i roto i te i'oa o Iesu Mesia ia matara te hara ia horoahia mai ia te Varua Maitai ia outou." E nahea hoi te tamarii rii, tei ore e taa to ratou mana'o, tei ore e ite i te haapaoraa? Ua na ô maira ia Iesu. "Mai ia ratou hoi to te basileia o te Atua." Na to ratou viivii ore e te hara ore e ô ai te tamarii rii i te basileia o te Atua i te vahi i haapaohia no ratou. Aore roa te hara a Adamu e mana'i i nia ia ratou, no te mea ua hopoi-ê-hia te reira e Iesu. E hiopoa rii tatou i na tau irava rii tumu i parau ai te tahi mau haapaoraa e ua tia te baptizoraa tamarii rii. Te ite nei tatou atoa ua baptizohia o Ludia e ta'na fetii atoa. Na ô hoi te papairaa o te tahi haapaoraa i taua vahi ra. "Aita parauhia e, e ua faaerehia te tamarii." Uiraa; E tamarii anei to reira? Teie te parau aita tatou i ite. No reira eiaha e taturi noa'tu i taua parau ra ei faatia ra i te baptizoraa tamarii. Ohipa 15: 16. Teie te parau no te tia fare tapaeraa. "E baptizohia i hora oia e to'na atoa ra i reira ra. Oaoa

roa'tura oia e ta'na utua fare atoa ma te faaroo i te Atua." Ohipa 16: 33, 34. Papu roa ino te irava e, aita roa'tu e tamarii i taua utua fare ra, no te mea "oaoa roa'tura oia e ta'na utua fare atoa ma te faaroo i te Atua." Ahiri mai te mea e e tamarii rii to reira, ua tia anei ia oaoa roa'tura te tamarii rii ma te faaroo i te Atua? Aita roa ia. Teie atoa te tahi. "E ua baptizo atoa vau i te fetii o Setephano, aita'tu a'u taata i ite i te baptizoraa vau." Kor. 1, 1: 16. A hi'o tatou i te pene 16: 15.

Na ô hoi te taioraa. "E te a'o atu nei au ia outou e a'u mau taeae e ite maitai outou i te utua fare o Setephano o te oho matamua hoi ratou i Ahaia, e ua ru noa ratou i te tauturu atu i te feia mo'a ra." Teie te tahi feruriraa. Eaha e ru noa te tamarii rii i te tauturu atu i te feia mo'a? Teie te mana'o, aita roa'tu. E au mau hoa e eiaha e tiaturi noa'tu i teie nei tau irava i faaitehia i nia nei ei faatia ra i te baptizoraa tamarii rii. O tei tiaturi noa'tu i teie nei tau irava faaitehia i nia'e ei tumu no te baptizoraa tamarii rii; ua patuhia ia to ratou faaroo i nia i te one, tumu ore, tiaraa ore.

Ua tonohia mai te hoê taata o Ioane te i'oa. E ua poro haere oia i te evanelia i te na ôraa'tu i te taata e tatarahapa te fatata mai te basileia o te Atua. Mat. 3: 3. E i muri iti a'e ia'na ua haapii haere Iesu i te parau maitai o te basileia o te Atua, na ô atura a tatarahapa a faaroo mai i te evanelia. Mar. 1: 15. Ua haapii atoa Petero na ô atura. "A haapenitenia e ia pape titohia outou atoa na i te i'oa o Iesu Kirito, ia matara ta outou na mau hara. Ohi. 2: 38. Aita'tu ia haapiiraa papu i teie. Ia tatarahapa te mau taata ia matara ta ratou ihora mau hara. Eiaha râ no te hara a Adamu. E tia anei i te mau tamarii rii ia haapao i teie nei a'oraa evanelia a Petero? Teie te haapiiraa "A haere outou e haapii atu i to te mau nunaa'toa, e e papetito atu ia ratou i te i'oa o te Metua, e no te Tamaiti, e no te

Varua Maitai: Ma te haapii atu ia ratou i te haapao i te mau mea'toa ta'u i faaue atu ia outou na." Mat. 28: 19, 20. Ua tia anei ia ratou i te haapii i te mau tamarii rii i te haapao i te mau mea ta Iesu i faaue atu ia ratou? Aita roa ia. Teie te tahi parau. O te faaroo, e ua papetitohia ra, e ora ia, area o te ore e faaroo ra, e faahapahia ia. Mar. 16: 16. A taio i te papairaa o te tahi faaroo. "Teie tau irava rii, te tumu i parau ai te tahi pae taata e, e aita i tia ia papetitohia te tamarii, no te tia ore ia ratou ia faaroo e ia haapao, no reira e tia mau ai ia papetitohia ratou ma te titau ore hia te faaroo. No te mea ua ite tatou e, i roto i te mau irava eravehia i nia'e nei ua viivii atoa ia ratou i te hara o Adamu; e eita roa te mea viivii e ô i nia i te rai. Apok. 21: 27: e te parau hoi a Iesu: o te ore i fanau faahou i te pape e te Varua Maitai eita ia e ô i te basileia o te Atua; e te hinaao râ hoi te Atua ia ora te taata'toa. Ihea ia te parauraahia e ua opani o Iesu i te tamarii, eiaha ia papetitohia? Aita ia." Te haapii atu nei matou e eiaha roa ia bapetizohia te tamarii, no te mea e e ore roa e tia ia ratou ia faaroo, e ia tatarahapa ei na mua i te papetitoraa. No te mea hoi ua na ô Iesu i te parau, "O te faaroo e ua papetitohia e ora ia." E te mau tamarii hoi o tei ore e tia ia faaroo e ia tatarahapa; eaha ia ia ratou? E papetizo anei ia ratou? Eiaha roa ia. No te mea hoi aita a ratou iho e hara, e te hara a Adamu ua hopoi-ê-hia te reira e te Mesia. E no reira i parau ai te Mesia e, "e tuu noa mai i te tamarii rii ia haere noa mai ia'u nei, eiaha e faaore hia'tu; ua haapaohia hoi te basileia o te rai ra no ratou." E no to ratou hara ore, e te viivii ore hoi e tae mau râ i te basileia o te rai i te vahi i haapaohia e te Atua no ratou. Ua parau atoa Iesu, "ia ore te taata ia fanau faahou i te pape e te Varua, e ore e tia ia'na ia ô i te basileia o te Atua." Ua haapiiatu anei Iesu teie nei haapiiraa i te taata paari, e aore ra i te tamarii? Teie te parau i te taata paari. E tia anei i te

tamarii rii ia faaroo, e ia haapao hoi i teie huru haapiiraa? Aita ia. E teie nei te taa papu roa ra te mana'o e ei haapiiraa teie na te taata paari, eiaha roa na te tamarii. E te taata tei taa to'na mana'o, tei ite i te haapiiraa, e tia ia'na ia faaroo, e ia tatarahapa, e ia baptizohia, ia ore te reira huru taata ia fanau faahou, oia hoi ia baptizohia, eita roa ia oia e ô i te basileia o te Atua. I hea ia ta Iesu parauraa ia baptizohia te tamarii rii e tia'i? Aita roa ia. I te matahiti 253 i muri a'e i te Fatu ua faatohia te apooraa o te mau episekopo i Carthage, fenua Aferika, e ua na ô maira ratou, ia baptizo oioi noahia te mau tamarii i muri a'e i te fanauraa, oia hoi, mai te hoê e tae noa'tu i te piti e te toru o te mahana. No reira te taa maitai roa ra te mana'o e, ua haamau taua apooraa episekopo, tei faaterehia e Kaporiano taua oroa hairesi, hape rahi tia ore, itea-ore-hia mai e tae noa'tu i te pae matamua no te toru o te tenetere i muri a'e i te Mesia. E inaha hoi ua haapaohia te reira e te mau haapaoraa e rave rahi mai reira mai i teie nei â. E e peu te reira i faatupu-noa-hia e te taata ana'e, mai te faaue-ore-hia mai e te Mesia. Teie râ ua tupu mau te parau o te peropheta i te na ôraa e, "ua hapa ratou i te ture ra, ua rure-hia e ratou tei haapaohia ra."—VILIAMU SETEMILA.

E mea ruperupe rahi te ekalesia a Iesu Mesia i te Feia Mo'a i te Mau Mahana Hopea nei i te fenua ra o Samoa. Te haapii haere nei na orometua 30 i te evanelia i reira, e te tupu nei te ekalesia i te maitai e i te rahiraa. Teie te rahi o te mau taeae e te mau tuahine i taua fenua ra, oia hoi, 1,761. Ua baptizohia na taata apî 200 i te matahiti i mairi a'enei. Ua faatiahia na haapiiraa e 7, e te haere nei na tamarii 300 i taua mau haapiiraa, ia haapiihia ratou i te mau haapiiraa e maitai ai ratou e te mau orometua. Ua riro te motu Tutuila e na motu iti i te hau Amerika i na matahiti i mairi a'enei. E te tauturu maitai nei te hau ta'na mau taata.

E Ohipa Tei Tupu i Takapoto.

U A FAATIAHIA te hoê tamaru, ua ravehia ia to'na mau taihaa maohi, to'na mau pou e haari ia, i faanehehe-maite-hia e ua penihia i te peni uouo, tapuhia i te peni matie. Ua tore-haere-hia i te reva Farani. Te aho e haari, te rape e haari, te tahuhu e haari, te mau rati e haari, te mau raau tarava i ropu e haari, i faanehehe-maitai-hia e ua penihia i te peni uouo. Ua tapoihia i te punu. E tahua pua ia to'na. E ua paruru-hia i te ahua uouo (faraoti) e ua faatia-hia na raau hutiraa reva i nia ia'na e toru. Teie te faito i to'na rahiraa i raro nei, 56 avae i te roa, 26 avae te aano, 8 avae te teitei. Ua haamatahina oia i te faatia-raa-hia i te avae ra Tiunu, 1910, e i faaotiahia to'na tomoraa i te 19 no Novema, 1910, hora io i te poipoi. Teie te huru no to'na tomoraa. Ua titau mai te tavana no Takapoto o Matapo a Teahi i te tavana no Takaroa o Pori a Tepeva e te huiraatira e te taurearea no te tomoraa i teie nei tamaru, e no te hoê â tumu, oia hoi te tahoêraa, i na tavana e na huiraatira i roto i te ohipa hoê, e te mana'o hoê, ei faaoreraa i te au ore i ropu ia raua. Ua tae te tavana no Takaroa e na huiraatira e te taurearea i te 17 no Novema, e ua fariimaitai-hia oia e te huiraatira atoa e te tavana no Takapoto e to'na huiraatira, e ua horoa mai i te tapao no to'na fariiraa, oia hoi 15 puua, 100 faraoa hopue, 60 ete haari. A'o orero mai ai te tavana no Takapoto i teie parau poto, naô maira, "e te tavana no Takaroa e te apoora e te huiraatira e ta oe himene. O te mahana teie i ai ta'u aau i tē oaoa e te popou rahi, o te mahana teie i farerei taua i to taua taa êraa mai te here e te aroha, o ta oe meleti maa na'u ia, ta'u ra na oe ia. Ia ora na taua." Ua pûpû-hia mai te mana no te ohipa tomoraa no te tamaru e te tavana no Takapoto, i roto i te rima no te tavana no Takaroa. E i te 19 no Novema, hora io haere ana'e'tura e na tavana e na huiraatira e te taurearea i te tomoraa.

Himeneraa 1. Himene na to Takapoto fariiraa te tavana no Takaroa, te huiraatira e te taurearea. Himene 2. Himene na to Takaroa, toparaa i'oa no te tamaru o "Ragikohua." Iritibia te opani no te tamaru, tomoraa i roto na tavana e na huiraatira e na himene. Himene 3. Himene no to Takapoto toparaa i'oa piti o "Teraimumu" i roto i te fare. Haereraa i rapae, himene na to Takaroa e te aparau raa, faataaraa no te i'oa ra o "Ragikohua", na Hiriata. Himene hopea na to Takapoto, aparauraa faataa ra no te i'oa ra o "Teraimumu" na Togi. I na taima i muri a'e ua nahonaho te maa i haapaohia no te tomoraa. Haamata maira te tavana no Takapoto i te hoê maa parau na ô maira. "E te tavana no Takaroa, te apoora, na huiraatira e te himene puhune, Ia ora na i to tatou farereiraa, teie te mau mea i haapaohia e au na oe no te tomoraa i to tatou tamaru, o

te mahana teie e horoa'tu ai au ia'u e te huiraatira atoa no Takapoto i roto i to rima, e teie nei ohipa tamaru na oe e faatere, e te mau vahi atoa no teie nei fenua, i na, i to rima. Ia oti to'na mau mana'o. Ua fariihia e te tavana no Takaroa. Tei auvaha o R Toriki e e rave rahi te parau haapopou ta'na i pahono. Faatere-noa-hia te mau arearea himene mai te pea-pea ore I te 21 no Novema, 1910, hora 7 i te ahiahi faafarereihia te tavana no Takaroa e te tavana no Takapoto na roto i te tao'a horoa. Ua horoa te tavana no Takaroa hoê hei pârau no te tavana no Takapoto. Ua horoa te tavana piti no Takaroa, hoê hei pârau no te raatira (fatu) himene. Ua horoahia te tahi mau hatua pârau no te mau raatira himene, e te hatua reva Farani no te mau taurearea no Takapoto, e te taupoo e te hei tarona, no te mau taurearea vahine ei tapao no te tahoêraa no Takaroa e Takapoto i roto i te ohipa hoê e te aroha taeae. I parauhia aita e oroa i hau i teie i te Tuamotu nei i te nehenehe e te maerehia hoi. Te mau ahuru no te mau tane no te tomoraa, e te mau vahine, te hei pârau anaana, e te hatua pârau, e te hatua reva Farani, te hei tarona, ahuru paruai nehenehe, te reva Farani i nia i te mau fare, te mau boti, ua rau te huru. Te mau himene navenave te himene re'o nota. Ua hanahana roa te ohipa i ravehia i Takapoto i te 22 no Novema, 1910, hora io i te avatea. Ho'i ana'e'tura to Takaroa mai te aroha e te oto. Te vai atura vetahi mau ohipa i ravehia i Takapoto i teie nei â mahana.—DAHA PUHARA.

Te Matahiti Api i Papeete Nei.

U A HAAPAOHIA ta matou matahiti api i Papeete nei i te 31 no Ditema. I na mahana rii i mua'e, ua tahoê ihora to te ekalesia i to ratou mana'o, e ua aufauhia e ratou te moni rii-tai piti toata i te taata hoê ei hoo i te mau maa e au no taua amuraamaa ra. E piti a matou puua maohi i horoahia mai, te tahi na Maruake a Maruake e te tahi na to Pirae. E ua navai roa ia. Ua tunuhia te mau maa i raro a'e i te fatereraa o Maria raua o Tiulia. E maa papaa ana'e tei ravehia, maori râ te poi mea, tei tunuhia e Taha raua o Teipo e mea maitai roa. Na Tahiri na puua i tunu i roto te umu maohi e e mea maitai roa ino te reira. E rave rahi te faraoa monamona e te pai hoi i tunuhia e Maria ma. Hora ono i te ahiahi tamaa ana'e ihora matou ma te aaui rotahi, e te popou rahi. Ua tae to matou rahiraa i te 50. E paia a'era haaputuputu maira i te piha tairururaa. Haamata ihora te amuiraa i te Himene e te haamaitai i te Atua. E i muri a'era, faaterehia te mau hoho'a e Tira raua o Ole. E mea maitai. E i oti a'era haamatahia te mau hauti-rii arearea rahi. Hora ahuru ma hoê, ua haapaohia te pureraa Matahiti Api. Hora ahuru ma piti e te afa faaotihia te pureraa. Tia paatoa a'era i nia tuu ana'e ihora te tapao aroha te tahi i te tahi no te Matahiti Api, haere ana'e'tura i te utua fare ma te oaoa e te mauruuru rahi.—W. A. S.

Te Mau Parau Api.

I TE 10 no Ditema ua tae mai te pahi machine vitiviti rahi "Suzanne" no te mau fenua Raiatea ma. E ua afai mai oia na honu ora 22. No te motu Scilly teie nei mau honu i te afai-raa-hia mai. E mea hinaarohia e te taata ei maa na ratou, no reira e mea hoo maitai i te matete i Papeete nei.

Ua oti te tahi pahi auahi i te hamanihia i te fenua Beritani i te matahiti mairi a'enei. I parauhia e hau a'e taua pahi i te rahi i te mau pahi auahi i hamani-ê-hia na, Te "Olympic" to'na i'oa. E 882 avae i te roa. E ua au ia'na ia faauta 5000 feia ratere mai te peapea ore, e e parahi ratou i roto i te mau piha vitiviti roa, mai te mea e tei roto ratou i te tahi fare tipaeraa nehenehe roa i nia i te fenua nei. E maha a'na haapupuraa auahi. E e piti a'na tira auri haamaitai-roa hia (steel). E te hamani faahou â taua totaiete ra i te tahi pahi mai ia'na te huru.

I te mahana 23 no Novema ua taparahia te taata ra o Harvey Crippen i te oire Lonedona i Beritani. Teie ta'na hara i rave na, ua taparahi oia i ta'na vahine i te avae Febuare, e ua huna oia ia'na i raro a'e i to'na fare, e ua tapoi oia i ta'na tino i te pua ia ore ei haua, e ia pe vave. I te avae Tiurai ua iteahia taua hara na'na ra. Horo'tura oia e te tahi vahine api na'na. Auau atura te taata toroa ia'na roohia'tu tei tua roa raua. Ua faahoia raua e a'na. Ua haavahia oia i Beritani, e ua faahapahia ia, e ua faautuahia ia pohe oia. E i te avae Novema ua tarîhia oia ei hoo no taua hara riaria rahi i ravehia e a'na.

Ua faatere te taata ra o Ralph Johnson ta'na pahi reva i te 17 no Novema i te oire Denver, i nia roa i te reva. E i muri a'e ua pou i raro mai te maitai e te peapea ore. E ua faatere faahou oia te pahi i nia, e ua tae oia e 500 avae i te teitei i nia'e i te fenua nei, ei reira roohia te pahi i te ati e aita roa e ravea ia faaterehia e a'na, e ua huri, mairi taue noa i nia i te fenua ra e ua pohe roa oia. E taata tuiroo oia i te faatereraa pahireva. I na mahana rii i mua a'e i to'na poheraa ua faatere oia i ta'na pahi 9,714 avae i te teitei. Te faatereraa pahi reva te reira i hau a'e i te teitei i te mau mauêraa pahi reva i iteahia na i te ao atoa nei. Ua putuputu na taata 15,000 i reira ei mataitai taua maueraa pahi. E i te hopea ra ua riaria roa ratou i te iteraa ia'na e ta'na pahi atoa i te toparaa i raro, no nia roa mai i te reva. A u ai oia i te fenua nei, ua horo pupara noa'tura te mau taata a hi'o ia'na. E ia papu râ ratou e ua pohe roa, ua haru noa ratou te mau hua raau, e te ahu e te tahi noa'tu â mau mea no nia i ta'na pahi ei mana'oraa ia'na.

HISTORIAN'S OFFICE

Church of Jesus Christ of Latter-day Saints

47 East South Temple St.

I te 22 no Novema i mairi a'enei i te mataeinaa ra o Missouri i Amerika. Te pauima ra te tahi tamaiti o Ralph Rub te i'oa i nia i te tahi raau. Tei haamauhia i nia i te a'i o taua tamaiti ra te tahi fifi. E i to'na paiuma-haere-raa, inaha hoi mahemo a'era ta'na avae. E ua mau taua fifi ra i nia i te tahi amaa, ri a'era oia, pohe roa ihora.

Ua pau i te auahi te tahi fare raveraa ohipa i te oire ra o Newark i Amerika i te 26 no Novema. Te rave ra na tamahine 200 i te ohipa i nia i te tahua 4 o taua fare ra. E inaha hoi, ua ama i te auahi. Ua haamata i te tahua i raro, e ua tae i nia roa, no reira aita e ravea ia tae ratou i raro na te mau e'a. I te pae fare i raro ua tuuhia te tahi upea e te mau taata haapohe auahi. Ou'a noa te tahi pae i raro, tei tano ra ora'tura, tei ore e tano ra, pohe roa ihora. Ua pohe roa 24. Ua pepe ino roa te tino o na tamahine 85. Ua moê 85. Ua pohe roa na tamahine 8, o tei afaihia'tu i te fare ma'i.

Ua tupu te orure hau e te peapea rahi i te avae Novema i te fenua ra o Maco, te tahi fenua motu i pihaiho i te fenua Tinito, e fenua moana aihu'araau no Potogi i Europa. Ua amui te mau faehau, no taua fenua ra e te mau mataro no te manuâ "Patria" ei nuu rahi orure, Ua haavihia te tavana e te mau taata toroa e ratou. E ua titau ratou ia faarahi te tavana te taime no te mau faehau, e te mau mataro atoa. E ua titau ratou ia'na ia tiahi-ê-hia'tu te mau haapaoraa e a'na. E ia faaore oia i te vea "Vida Nova", eiaha ia nenei-faahou-hia. E ia faaore hia te mau hamani ino no te mau faehau e te mau mataro e tia'i. Ua mätä'u roa te tavana e te mau taata toroa i raro a'e ia'na no te mea ua faairihia te mau 'o'e i nia ia ratou. E no reira ua faatiahia te mau titau raa o te nuu orure e te tavana. No te mätä'u rahi ua horo te mau vahine paretenia, e te mau tamarii e rave rahi i te oira rahi o Hong Kong i te fenua Tinito. I parauhia aita ratou i hamani ino noa'tu i te mau papaa ê ê tei parahi i reira. Te tia nei râ te hau Beritani i taua peapea ra, e mai te mea e hamani ino noa'tu te mau orure hau i te huiraatira Beritani tei parahi i reira e tonono oia i te tahi manuâ ei paruru i ta'na mau taata. E te tia atoa nei te hau Tinito i taua peapea ra, e mai te mea e hamani ino noa'tu te mau orure i ta'na mau taata e tonono oia i te mau faehau ei paruru ia ratou.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.